

MOVIMENTU KONTRA OKUPASAUN TASI TIMOR (MKOTT)

Dili, 28 Agostu 2019

Deklarasaun Públiku kona-ba Prosekusaun Hasoru Witness K ho Bernard Collaery husi Governu Australianu

Ho ksolok boot tebes, MKOTT hakarak anunsia ohin kata kami nia petisaun hodi husu ba Federal Attorney General Australia nian, Hon. Christian Porter, MP. atu hapara prosekusaun hasoru Bernard Collaery ho Witness K hetan ona asinatura hamutuk ema Timor oan na'in 4,058. Sira ne'ebé asina petisaun ne'e mai husi estudantes, profesores, universitarius, jornalistas, offisiais ONG sira, offisiais governu no sidadaun baibain. Ida ne'e testamentu ida ba povu Timor-Leste nia hakarak jenuinu ba sira nia prosekusaun atu labele hafo'er relasaun bilateral entre Australia ho Timor-Leste.

Ami nia petisaun bolu Federal Attorney General Australia nian atu invoka ninia autoridade ne'ebé 71 husi Australian Judiciary Act tinan-1903 atu hapara imediatamente prosekusaun hasoru Bernard Collaery ho Witness K.

Ami hatene katak Australia nia Primeiru Ministru, Hon. Scott Morrison, MP sei halo viajen mai Dili iha okaziaun selebrasaun aniversariu Referendum 30 Agostu ba dala 20. Ami mós hatene katak durante iha Dili, Sr. Morrison sei prezide troka de notas entre governu Timor-Leste ho Governu Australia atu formaliza ratifikasaun ba tratadu fronteira marítima entre rai rua, ne'ebé asina tiha ona iha loron-6 fulan-Marsu tinan-2018.

MKOTT hakarak atu fó hanoin fila fali ba Primeiru Ministru Scott Morrison dala ida tan katak se la'ós tanba Witness K no Bernard Collaery, Australia ho Timor-Leste sei la negocia, konkorda no asina tratadu ida ne'e. Tan ne'e, ami husu Primeiru Ministru Scott Morrison ho ninia governu atu trata petisaun ida ne'e nu'udar kestaun prioridade no urjente ida.

Selebrasaun sira loron-30 fulan-Agostu nian, liuliu ratifikasaun tratadu fronteira marítima nian sei la kompletu se la ho Bernard Collaery no Witness K nia liberdade, eroi no belun boot povu Timor-Leste nian.

Se sira nia prosekusaun mak kontinua, ida ne'e sei hatudu de'it katak governu Australia tama ona ba tratadu fronteira marítima ho Timor-Leste ho má fé no ida ne'e sei kontinua inkomoda ita nia relasaun bilateral.

MKOTT mós hakarak Primeiru Ministru Scott Morrison atu fó netik ninia tempu minute balu hodi simu petisaun ne'ebé ami asina tiha ona ho ninia liman rasik no atu hola medida ruma bainhira nia fila fali ba Australia.

OBRIGADU.